

## 2 KORIN

### *Pol a Yesus Kristus aqa wau tamo*

<sup>1</sup> E Pol. Kristus Yesus na e qariñbej deqa e aqa anjam mare mare laqnum. Qotei aqa segi areqalo na e wau di ebej. Aqo gago was Timoti wo anjam endi neñgreñyonum. Neñgreñyosim niñgi Korin qureq di Qotei qa loueqnub qaji niñgi ti Qotei aqa segi tamo uñgasari kalil Akaia sawaq di unub qaji nañgi qa ti qarinyonum. <sup>2</sup>Gago Abu Qotei wo Tamo Koba Yesus Kristus wo nañgi aiyel niñgi qa are boleinjrimqa niñgi lawo na soqniy.

### *Qotei a gago are latetgeqnu*

<sup>3</sup> Iga gago Tamo Koba Yesus Kristus aqa Abu Qotei aqa ñam soqtoqnqom. A gago Abuunu deqa a iga qa dulqajqa utru. A gago are tulan latetgwajqa Qotei. <sup>4</sup> Deqa a gago gulbe kalil qa iga are latetgeqnu. A kumbra degyeqnu deqa iga na olo kamba Kristen tamo uñgasari gulbe ti unub qaji nañgo are latetnjreqnum. <sup>5</sup> Kristus a jaqatin koba qoboiyej deqa iga a ombla jaqatin koba qoboiyeqnum. Dego kere Kristus a are tulan laesonqa iga a ombla are tulan laejunum. <sup>6</sup> O ijo was kalil, aqo Timoti wo gulbe eqnum di aqa utru agiende. Gago gulbe dena Qotei na nunjo are latetngosim niñgi elenqas. Ariya Qotei na gago are latetgeqnu di aqa utru agiende. Kumbra dena dego Qotei na nunjo are latetngosim niñgi dego qoboiyoqnsib sinjila na tigelesqab. <sup>7</sup> Iga niñgi

qa gago areqalo siŋgilatosim endegsi mareqnum, bole, ningi singila na tigelesqab. Iga qalieonum, ningi iga ti beterosim jaqatin eqnum deqa Qotei na ningi iga ti gago are latetgoqnqas.

<sup>8</sup> O ijo was kalil, iga Esia sawaq di gulbe kobaquja item. Gulbe dena iga ugeugeigosiqqa gago singila tulan bunyej. Deqa iga endegsi are qalem, gulbe dena iga moiyyotgwas. O ijo was, ningi gago gulbe deqa qalieoij. <sup>9</sup> Bole, iga are qalem, gulbe dena iga moiyyotgwas. Anjam pegino tamo na tamo bei minjgas, “Ni une ti unum deqa ni moiqam.” Dego kere iga are qalem, gulbe dena iga moiyyotgwas. Qotei na gulbe di iga egej. Di kiyaqa? Iga gago segi singila qa are qalaim deqa. Iga Qotei aqa singila qa are qaloqnqom. Agi a na qujai moiyo tamo naŋgi olo subq na tigeltnjreqnu. <sup>10</sup> O ijo was, gulbe dena iga moiyyotgwa laqnaqa Qotei na gulbe di taqal atetgej. Bunuqna dego a na gago gulbe taqal atetgoqnqas. Deqa iga Qotei qa gago areqalo siŋgilatoqnsim mareqnum, bole, a na olo gago gulbe taqal atetgoqnqas. Yim iga bole sqom. <sup>11</sup> O ijo was ningi iga qa Qotei pailyoqniy. Yimqa Qotei a nunjgo pailyo de ti tamo ungasari gargekoba naŋgo pailyo ti quoqnsim iga aqaryaigoqnqas. Gam dena ningi na dego iga aqaryaigoqnqab. Yim tamo ungasari gargekoba naŋgi Qotei tulan binjyoqnqab.

### *Pol a Kristen naŋgi gisaŋnjrosaioqnej*

<sup>12</sup> O was kalil, ijo are miliq di e qalieonum, e kumbra bole tintin segi dauryoqnsim unum. E ijo kumbra deqa tulan areboleboleibeqnu. Kumbra

bole kalil Qotei na osorbeqnu qaji di segi e daury-oqnsim unum. E mandam tamo nañgo powo na kumbra di yosaieqnum. Qotei a e qa are boleiy-oqnsiq kumbra osorbeqnu qaji di segi e yeqnum. Deqa e na tamo uñgasari kalil nañgi kumbra bole gaigai enjreqnum. Agi e na ningi dego kumbra tulan boledamu engoqnem. **13-14** Ijo anjam endi ningi sisiyosib poiñgwaqja deqa e neñgreñyonum. Bole, ijo anjam qudei qa ningi geregere poiñgosai unu. Ariya ijo are endegsi unu. Ningi ijo anjam kalil qa poiñgekritim gilsib diño bati itqab. Yim gago Tamo Koba Yesus a olo bqajqa batiamqa ningi e qa tulan areboleboleingim e kamba dego ningi qa tulan areboleboleibqas.

**15-16** Ijo are miliq di e nami qalieem, ningi ijo kumbra kalil qa tulan areboleboleingim sqab. Utru deqa e na niñgi merñgem, “E mati nuñgoq bosiy niñgi uratñgosiy Masedonia sawaq gilsiy dena puluosiy nuñgoq olo bqai.” Od, e bati aiyel nuñgoq bqajqa are qalem. Di kiyaqa? Qotei na niñgi gereingo aiyeltñgwaqja deqa. È nuñgoq olo bosiy dena Judia sawaq aiqa laqnitqa niñgi silali qa aqaryaibibqa e gamq di ingi bei qa truquaim deqa ti are qalem. **17** Ningi endegsib are qale-qnub kiyo, “Pol aqa anjam di a dauryosai. A na iga gisanjej. A mandam tamo nañgo kumbra dauryoqnsiq deqa a anjam bei maroqnsiq olo urateqnu. A laña odoqnsiqa olo saideqnu.” O ijo was niñgi e qa degsib are qalaib. **18** Qotei a tamo bole unu deqa a aqa segi anjam kalil dauryeqnu. Deqa e dego anjam bole segi niñgi merñgeqnum. E laña odoqnsim olo saidosaieqnum. **19** Nami aqo Timoti wo Sailas ombla na wauoqnsim Qotei

aqa Niri Yesus Kristus aqa anjam palontoqnsim ningi merηgoqnem. Ningi qalie, Yesus a dego laja odoqnsiq olo saidosaieqnu. A gaigai Qotei aqa ñam na odeqnu. <sup>20</sup> Qotei a nami ingi bole bole iga egwajqa marej. Kristus a odeqnu deqa Qotei na ingi di iga egwas. Deqa iga Kristus aqa ñam na mareqnum, “Bole.” Osim iga Qotei aqa ñam soqteqnum. <sup>21</sup> Qotei a segi na ningi iga ti singilatgeqnu. Singilatgeqnaqa ningi iga ti Kristus beteryejunum. A na qujai iga aqa segi qa marsiq giltgej. <sup>22</sup> Osiqa aqa toqor egsiqa gago are miligiq di atej unu. Aqa toqor di aqa Mondor Bole. Mondor di Qotei na iga namo egej deqa iga qalieonum, bunuqna ingi bole bole a na iga egwa marej qaji di dego egwas.

*Pol a Korin Kristen nañgi gulbe enjrqa uratosiq  
deqa a nañgoq olo bosai*

<sup>23</sup> O ijo was, e Qotei aqa ñam na ningi endegsi merηgwai. E ningi gulbe enjwa uratosim deqa e olo Korin qureq bosai. <sup>24</sup> Nuñgo areqalo Yesus qa singilateqnub qaji di iga na laja taqatosaeqnum. Iga ningi ti koba na Yesus aqa wau ojeqnum. Di kiyaqa? Ningi tulañ areboleboleingwajqa deqa. Iga qalieonum, ningi nuñgo areqalo Yesus qa geregere singilatosib tigelejunub.

## 2

<sup>1</sup> Ariya e olo Korin qureq bosai. E marem, e olo are gulbe na nuñgoq bqasai. <sup>2</sup> E ningi are gulbetetηgwai di tamo yai na olo ijo are boletetbqas? Ningi segi na ijo are boletetbqa kere. <sup>3</sup> Deqa e nuñgoq olo bosiy are gulbe oqa uratonum. E nuñgoq bosiy areboleboleibqas di kere. Utru deqa

e anjam bei nami neñgrenjyosim nuñgoq qarinyem. E qalieem, e areboleboleibqas di niñgi kalil dego ijo arebolebole di unsib e koba na areboleboleigwas. <sup>4</sup> Bole, e are gulbe ti akam ti sosim anjam di neñgrenjyem. E niñgi are gulbetetnjwa osim anjam di neñgrenjyosai. E niñgi tularj qalaqalaingeqnum di niñgi qalieqajqa deqa e anjam di neñgrenjyem.

*Niñgi na tamo une atej qaji aqa une kobotetiy*

<sup>5</sup> Tamo qujai nami une atej qaji di aqa une qa e anjam koba mernjwasai. Tamo dena e are gulbetetbosai. A niñgi kalil are gulbetetnjgej. <sup>6</sup> Aqa une aqa awai uge niñgi gargekoba na a yeb di kereqo. <sup>7</sup> Deqa bini niñgi olo aqa une kobotetosib aqa are latetiy. Yim a are boleqas. Niñgi degyqasai di a olo are tularj gulbe ti so uge. <sup>8</sup> Deqa niñgi a olo qalaqalaiyo kumbra osoryoqniy. Yim a qalieqas, niñgi a torei qoreiyosai. <sup>9</sup> E nuñgo kumbra tenemtosiy niñgi ijo anjam kalil dauryeqnub kiyo sai kiyo di qalieqajqa deqa e nami anjam neñgrenjyosim nuñgoq qarinyem. <sup>10</sup> Niñgi tamo bei aqa une kobotetqab di e kamba dego aqa une kobotetqai. E tamo bei aqa une kobotetqai di e niñgi qa osiy Kristus aqa ñamgalaq di kobotetqai. <sup>11</sup> Tamo uge Satan na iga gisangosim ugeugeigaim deqa e degyqai. Satan aqa areqalo uge ti aqa uli kumbra ti di iga bole qalieonum.

*Pol a Taitus unqa marej*

<sup>12</sup> O ijo was kalil, e Kristus aqa anjam bole palontqa osim walwelosim Troas qureq di brantem. Brantonam Tamo Koba a na gam waqtetbonaqe dia aqa wau ojoqnem. <sup>13</sup> Bati di e ijo was Taitus itosai deqa e a qa are koba qaloqnem. Deqa

e Troas Kristen naŋgi olo uratnjsim Masedonia sawaq gilem.

*Yesus aqa wau tamo naŋgi qoto buŋyeqnub*

<sup>14</sup> Qotei a gaigai iga aqaryaigeqnaqa iga Kristus aqa siŋgila na qoto buŋyeqnum. Deqa e Qotei tulaŋ binjyeqnum. Iga Qotei aqa wau ojeqnum deqa tamo uŋgasari sawa sawa kalilq di unub qaji naŋgi Qotei qa bole poinjreqnu. Naŋgo powo di saban quleq ti bolequja bul. <sup>15</sup> Od, gago wau di qurem quleq ti bul Kristus na Qotei atraiyeqnu qaji. Quleq di tamo uŋgasari Qotei na eleŋeqnu qaji naŋgi ti tamo uŋgasari padalqa gamq di unub qaji naŋgi ti naŋgoq aiyeqnu. <sup>16</sup> Quleq dena tamo uŋgasari padalqa gamq di unub qaji naŋgi moiyo-tnjreqnu. Osiqa tamo uŋgasari Qotei na eleŋeqnu qaji naŋgi ɻambile enjreqnu. Tamo yai naŋgi Qotei aqa wau di yqa kere? Tamo dego bei sosai. <sup>17</sup> Ningi qalie, Qotei aqa anjam maro tamo gargekoba naŋgi silali oqajqa deqa osib Qotei aqa anjam mare mare laqnub. Ariya iga naŋgi bul sai. Qotei na iga wau egej deqa iga gisan na wauosaieqnum. Iga Kristus koba na are qujaitosim Qotei aqa ɻamgalaq di aqa anjam mare mare laqnum.

### 3

*Yesus aqa wau tamo naŋgi anjam bunuj mare mare laqnub*

<sup>1</sup> Iga gago segi ɻam soqtqajqa are unu e? Sai. Tamo qudei na kiyo ningi na kiyo iga qa anjam bolequja neŋgrenyqab di uŋgum. Ningi na kiyo tamo qudei na kiyo anjam bolequja di sisivosib gago ɻam soqtetgwab di dego uŋgum. Iga deqa are

qalosaieqnum. <sup>2</sup> Niŋgi segi neŋgreŋ bulosib gago kumbra qa saoqnsib laqnub. Niŋgi neŋgreŋ bul unub deqa tamo kalil naŋgi neŋgreŋ di sisiyoqnsib iga qa poinjreqnu. Neŋgreŋ di gago are miliqiŋ di unu. <sup>3</sup> Kristus a segi na anjam di neŋgreŋyobulej. Neŋgreŋ di Kristus aqaq na bosiq boleq di unu. Neŋgreŋ di niŋgi segi. Agi iga niŋgi wauetŋgeqnum. Kristus a mandam tamo bei aqa singila na anjam di neŋgreŋyosai. A Qotei ŋambile gaigai unu qaji aqa Mondor aqa singila na anjam di neŋgreŋyej. A meniŋq di neŋgreŋyosai. A tamo uŋgasari naŋgo are miliqiŋ di neŋgreŋyej.

<sup>4</sup> Anjam di aqa utru agiende. Qotei a Kristus aqa ñam na iga wau egej deqa iga aqa wau ojeqnum. Iga qalieonum, Qotei na aqa wau di geregere boletqas. <sup>5</sup> Bole, iga segi na wau di yqa keresai. Deqa iga gago segi siŋgila na Qotei aqa wau yeqnum degsi marqa keresai. Qotei a segi na iga siŋgila egeqnaqa iga aqa wau yeqnum. <sup>6</sup> Gago wau agiende. Iga Kristus aqa anjam bunuj palontoqnsim laqnum. Anjam bunuj di tamo qudei na dal anjamq di neŋgreŋyosai. Qotei aqa Mondor a segi na babtej. Dal anjam na tamo uŋgasari naŋgi moiytnejreqnu. Ariya Qotei aqa Mondor na tamo uŋgasari naŋgi ŋambile enjreqnu.

<sup>7</sup> Od, dal anjam na tamo uŋgasari naŋgi moiytnejreqnu. Dal anjam aqa wau agide. Dal anjam di Qotei a nami meniŋq di neŋgreŋyonaqa a riaŋti brantej. Deqa Moses aqa ulatamu riaŋjonaqa Israel tamo uŋgasari naŋgi aqa ulatamu koqyqa keresai. Nam qamotnjrej. Bunuqna riaŋ di olo koboej. <sup>8</sup> Ariya Mondor aqa wau bunuj unu. Aqa wau dena dal anjam aqa wau tulaŋ buŋyejunu.

Mondor aqa wau di olo torei riañosiq goge oqej.

<sup>9</sup> Dal anjam aqa wau agiende. A na gago une qa iga mergoqnsiq padaltgeqnu. Bole, dal anjam aqa wau di nami rianj ti bej. Ariya Qotei na iga tamo bole une saiqoji sqajqa gam babtej. Wau di olo tulañ rianj koba ti bej. Rianj dena dal anjam aqa rianj tulañ bunyejunu. <sup>10</sup> Wau bunuj di rianj koba ti unu. Rianj dena wau namij aqa rianj tulañ bunyejunu. Deqa iga wau namij aqa rianj uneqnum di a torei koboej. <sup>11</sup> Wau namij di gaigai sqa keresai. A koboqas. Bole, a rianj ti bej. Ariya wau bunuj gaigai sqas qaji a olo tulañ rianj koba ti unu. Rianj dena wau namij aqa rianj tulañ bunyejunu.

<sup>12</sup> Rianj koba di mondoñ bosim gaigai gagoq di sqajqa deqa iga tarinjoqnsim unum. Deqa iga ulaosaieqnum. Iga rianj deqa mare mare laqnum.

<sup>13</sup> Iga Moses soqnej dego sai. Moses aqa ulatamu rianj ti soqnej deqa a gara mutu oqnsiqa dena aqa ulatamu kabutoqnej. Di kiyaqa? Israel nangi unaib deqa. Ariya wau namij aqa rianj di koboej.

<sup>14</sup> Israel nañgo areqalo getenñjresoqnej deqa nangi anjam namij sisivoqneb di nañgo areqalo gara mutu na kabutobulesoqnej. Nañgi nami degsib soqneb agi bini unub. Tamo bei na gara di taçal atqa keresai. Kristus a segi na gara di olo taçal ateqnu. <sup>15</sup> Od, bati gaigai Israel nañgi Moses aqa dal anjam sisiveqnub di nañgo areqalo gara mutu na kabutobulejunu. Nañgi nami degsib soqneb agi bini unub. <sup>16</sup> Ariya tamo nañgi are bulyosib Tamo Koba aqa areq bqab di Qotei na gara di olo taçal atetnjqras. <sup>17</sup> Tamo Koba a segi Mondor. Niñgi Tamo Koba aqa Mondor ti sqab di nuñgo une

na niŋgi olo taqatŋwa keresai. Niŋgi bole sqab. <sup>18</sup> Deqa gago ulatamu olo kabuesqasai. Iga kalil Tamo Koba aqa riaŋ ya jeqiloq di unobuloqnqom. Unoqnim riaŋ di gagoq di tulaŋ kobaoqnimqa dena iga Tamo Koba a segi buloqnsim sqom. Tamo Koba a na kumbra di iga egeqnu. Tamo Koba a segi Mondor Bole.

## 4

### *Qotei aqa wau tamo naŋgi web bul unub*

<sup>1</sup> Qotei a iga qa dulosiqa wau egej deqa iga aqa wau di ojqajqa asgigosaieqnu. <sup>2</sup> Kumbra uge uge kalil tamo naŋgi na ulitoqnsib yeqnub qaji di iga olo qoreiyeqnum. Iga gisaŋ kumbra na walwelosaieqnum. Iga Qotei aqa anjam bubulyosaeqnum. Iga boleq di anjam bole segi mareqnum. Deqa tamo kalil naŋgi gago kumbra di unoqnsib naŋgo are miliqq di qalieeqnub, iga Qotei aqa ñamgalaq di wau bole yeqnum. <sup>3</sup> Ariya tamo ungasari padalqa gamq di unub qaji naŋgi Yesus aqa anjam bole iga palonteqnum qaji di aqa utru poinjrosaieqnu. <sup>4</sup> Mandam endeqa gisan qotei Satan a na tamo ungasari Kristus qa naŋgo areqalo siŋgilatosaeqnub qaji naŋgo areqalo getentenŋrejunu. Deqa Kristus aqa anjam bole naŋgo are miliqq aiqa keresai. Naŋgi Kristus aqa suwan unqa keresai dego. Kristus a segi Qotei. A segi riaŋ ti unu.

<sup>5</sup> Niŋgi quiy. Iga gago segi kumbra qa saosaeqnum. Iga anjam endegsi palonteqnum, “Kristus Yesus a gago Tamo Koba unu deqa iga aqa ñam na niŋgi wauetŋgeqnum.” Iga anjam degsi palonteqnum. <sup>6</sup> Tulaŋ nami Qotei a inŋgi inŋgi

kalil gereiyqa osiqa endegsi marej, “Ambru aqaq na suwanj brantqas.” Ariya bunuqna Qotei aqa suwanj di gagoq bosiqqa gago are miligi suwantetgej. Deqa iga Kristus aqa ulatamu geregere uneqnum. Kumbra dena iga suwanj bole unoqnsim Qotei aqa rian poigeqnu.

<sup>7</sup> O ijo was, ingi tulanj boledamu iga deqa mare mare laqnum qaji di gagoq di unu. Bole, iga singila saiqoji unum. Iga web jagi na gereiyo qaji di bul unum. Deqa tamo kalil nañgi iga nugoqnsib endegsib qalieeqnub, “Pol a aqa segi singila na wau di yosaieqnu. A Qotei aqa singila kobaqua na wau di yeqnu. Singila dena mandam qaji singila tulanj buñyejunu.” Tamo kalil nañgi degsib qalieeqnub. <sup>8</sup> Gulbe segi segi gargekoba gagoq beqnu. Ariya gulbe dena iga padaltgosaieqnu. Ingi ingi gargekoba na gago areqalo niñaqyetgeqnu. Ariya ingi ingi dena gago areqalo torei ugetetgosaieqnu. <sup>9</sup> Jeu tamo nañgi na iga jaqatin egeqnub. Ariya Qotei a deqa iga uratgosaieqnu. Jeu tamo nañgi dena iga lugoqnsib ḥeiotgeqnub. Ariya nañgi na iga torei ugeugeigosaeqnub. <sup>10</sup> Gago jejamuq di tamo ungasari nañgi gaigai Yesus aqa moiyo unobuleqnub. Deqa Yesus aqa ḥambile dego gago jejamuq di branteqnaq nañgi uneqnub. <sup>11</sup> Iga Yesus aqa wau ojeqnum deqa jeu tamo nañgi na batı gaigai iga moirotgwa laqnub. Nañgo kumbra dena Yesus aqa ḥambile dego gago jejamuq di branteqnaq tamo ungasari nañgi uneqnub. <sup>12</sup> Deqa moiyo a gagoq di waueqnu. Ariya ḥambile a nunqoq di waueqnu.

<sup>13</sup> Iga Yesus qa gago areqalo singilateqnum deqa Qotei aqa anjam bei neñgreñq di unu qaji a gagoq

di branteqnu. Anjam agiende, “E Qotei qa ijo are-qalo singilateqnum deqa e aqa anjam mare mare laqnum.” O ijo was, iga dego Yesus qa gago areqalo singilateqnum deqa iga aqa anjam mare mare laqnum. <sup>14</sup> Iga qalieonum, Qotei na Tamo Koba Yesus subq na tigeltej deqa mondon a na iga dego subq na tigelgwas. Osim iga niñgi ti joqsim Yesus aqa areq osi oqwas. <sup>15</sup> E anjam di niñgi mernjgonum. Di kiyaqa? E qalieonum, kumbra kalil gagoq di branteqnu qaji dena ningi aqaryaiñgeqnu. Gam dena Qotei a tamo uñgasari tulanç gargekoba nañgi qa are boleiyeqnu. Deqa nañgi Qotei binjyoqnsib aqa ñam soqteqnub.

*Iga lañ qure qaji inđgi inđgi qa are qaleqnum*

<sup>16</sup> Deqa iga Qotei aqa wau ojqajqa asgigo-saieqnu. Bole, gago jejamu a uge qa laqnu. Ariya gago are miligi a bati gaigai olo boleoqnsiq singilaeqnu. <sup>17</sup> Iga qalieonum, gulbe ti jaqatinj ti iga bini qoboiyeqnum qaji di tulanç kokba sai. Nangi sokiñalayosib koboqab. Iga gulbe di eqnum deqa iga qalieonum, mondon iga lañ qureq di so bole gaigai sqom. Inđgi bole bole iga mondon oqom qaji di tulanç boledamu. Inđgi bole bole dena mandam qa inđgi inđgi tulanç buñnjrejunu. <sup>18</sup> Inđgi inđgi iga gago ñamdamu na uneqnum qaji di sokiñalayosim koboqas. Deqa iga inđgi inđgi di koqyosaeqnum. Inđgi bole bole iga gago ñamdamu na unqa keresai qaji di bati gaigai sqas. Deqa iga inđgi bole bole di koqyoqnsim unum.

## 5

<sup>1</sup> Iga qalie, gago mandam qaji jejamu endi torei ugeqas. Gago jejamu endi gago tal bul. Mondon

Qotei na olo tal bei iga egwas. Tal di tamo bei na gereiyosai. Tal di laj qureq di bati gaigai sqas. <sup>2</sup> Iga bini mandam qaji talq endi unum deqa iga akamoqnsim unum. Iga gago laj qure qaji tal osim gara bul jugwajqa deqa are koba unu. <sup>3</sup> Iga tal di jugwom di iga olo laja sqasai. Iga jejamu bunuj oqom. <sup>4</sup> Iga mandam qaji talq endi unum deqa iga are gulbeigeqnaqa akamoqnsim unum. Iga jejamu bunuj osim gara bul jugwajqa are qaleqnum. Od, iga gago jejamu moiqas qaji endi uratosim olo jejamu nambile sqas qaji di oqajqa are qaleqnum. Iga jejamu saiqoji sqajqa asgigeqnu. <sup>5</sup> Nambile sqajqa gam di Qotei a segi na gereiyetgoсиqa aqa Mondor iga egej. Mondor di Qotei na iga namo egej deqa iga qalieonum, bunuqna ingi bole bole a na iga egwa marej qaji di dego egwas.

<sup>6</sup> Deqa iga gaigai are singilatoqnsim unum. Iga qalie, iga mandam qaji jejamu ti unum deqa iga laj qureq di Tamo Koba a ombla sosaiunum. <sup>7</sup> Bini iga Yesus unosaieqnum. Ariya iga a qa gago are-qalo singilatoqnsim walweleqnum. <sup>8</sup> Od, iga gago jejamu endi uratosim oqsim Tamo Koba a ombla sqajqa are qaleqnum. Laj qure a gago qure utru sqas. <sup>9</sup> Deqa iga bini mandamq endi sqom kiyo laj qureq oqsim dia sqom kiyo di unjum. Iga kumbra Tamo Koba a tulaj areareteqnu qaji di dauryqajqa are qaleqnum. <sup>10</sup> Iga qalieonum, mondon iga kalil Kristus aqa ulatamuq di tigelamqa a na gago kumbra qa iga pegigwas. Iga mandamq endi sosimqa iga kumbra bole yoqnem kiyo kumbra uge yoqnem kiyo di a unsim awai segi segi egwas.

*Iga tamo uŋgasari naŋgo are bulyetnjrqajqa deqa waueqnum*

<sup>11</sup> Iga Tamo Koba a qa ulaoqnsim aqa sorgomq di unum deqa iga tamo uŋgasari naŋgo are bulyetnjreqnum. Iga wau di ugetosaieqnum. Qotei a iga qa qalie bole. Nunjo are miliq di ningi dego iga qa qalie bole. E degsi are qalonum. <sup>12</sup> O ijo was, iga gago segi ñam soqtqa marsim anjam endi neŋgreŋyosai. Ningi gago kumbra qa areboleboleingwajqa deqa are qalsim anjam endi neŋgreŋyonum. Tamo qudei naŋgi laŋa baban na kumbra bole yqajqa arearetnjreqnu. Naŋgi are miliq na kumbra bole yqajqa arearetnjrosaieqnu. Deqa ijo was, ningi na tamo naŋgi di tingitnjroqnsib dalnjroqniy. <sup>13</sup> Tamo naŋgi di endegsib mareqnub, “Pol a nanari tamo.” Naŋgo anjam di bole. Iga Qotei qa are qalsim nanari tamo unum. Ariya iga ningi qa are qalsim areqalo bole ti unum. <sup>14</sup> Kristus na iga tulan qalaqalaigej aqa kumbra dena gago areqalo tigelteqnaqa iga aqa wau ojeqnum. Iga qalieonum, Yesus a iga kalil qa moiyej deqa iga kalil dego moreŋobulem. <sup>15</sup> Od, a iga kalil qa moiyej. Iga ñambile unum deqa iga gago segi jejamu qa are qalsim walwelqasai. Yesus a iga qa moisiq olo subq na tigelej deqa iga a qa are qaloqnsim walweloqnnqom.

<sup>16</sup> Deqa bini iga gago areqalo namij na tamo uŋgasari naŋgi pegijnrosaieqnum. Bole, nami iga gago areqalo namij na Kristus pegiyognem. Ariya bini iga degyosaieqnum. <sup>17</sup> Deqa tamo bei a Kristus beteryesqas di Qotei na aqa are bulyetimqa a tamo bunuj brantqas. Ningi quiy. Aqa kumbra namij torei koboej. Kumbra bunuj olo brantej.

<sup>18</sup> Kumbra bunuj di Qotei aqaq na bej. Nami iga Qotei ti jeu sonamqa Qotei a olo Kristus aqa singila na jeu kobotej. Deqa bini iga a ombla are qujaitosim unum. Jeu kobotqajqa wau di Qotei na iga egej deqa iga aqa anjam mare mare laqnum.

<sup>19</sup> Anjam agiende. Tamo uŋgasari mandamq endi unub qaji naŋgi nami Qotei ti jeu sonabqa Qotei na naŋgi a ombla are qujaitosib sqajqa marsiq Kristus aqa singila na jeu kobotej. Deqa a naŋgo une qa olo are qalosaieqnu. Iga Kristus aqa anjam di mare mare laqajqa deqa Qotei na wau egej.

<sup>20</sup> Kristus na iga qaringej deqa Qotei a gago med-abu na tamo kalil naŋgi metnjreqnu. Iga Kristus aqa anjam palontoqnsim tamo kalil naŋgi endegsi metnjreqnum, “Niŋgi jeu kumbra uratosib bosib Qotei ombla are qujaitosib soqniy.” <sup>21</sup> O ijo was, Qotei na iga aqaryaigwa marsiq deqa a gago une kalil osiqa Kristus aqa qawarq di atnaqa a une tamo bulej. Kristus a segi une yosaieqnu. Deqa iga Yesus beteryosim dena iga Qotei aqa segi tamo bole une saiqoji sqom.

## 6

### *Qotei aqa wau tamo naŋgi gulbe iteqnub*

<sup>1</sup> Iga Qotei ombla waueqnum deqa iga ningi singila na endegsi merŋgwom, “Qotei a niŋgi qa are boleiyeqnu aqa kumbra di niŋgi laŋa urataib.”

<sup>2</sup> Agi Qotei a nami marej, “E ni padalo sawaq dena oqajqa bati atem. Bati di brantonaqa e ino pailyo qusim ni aqaryaimem.” O was niŋgi quiy. Qotei na iga aqaryaigwajqa bati brantqo. A na iga padalo sawaq dena elenqajqa bati bini qujai.

<sup>3</sup> Tamo ungasari naŋgi gago wau endi uge qa marsib uloŋosib uneq aiyaib deqa iga na naŋgi kumbra uge bei osornjrosaieqnun. <sup>4</sup> Iga Qotei aqa wau tamo unum deqa iga gaigai tamo ungasari kalil naŋgi kumbra bole osornjreqnum. Iga siŋila na tigeloqnsim gulbe qoboiyeqnun. Gago gulbe agiende. Tamo qudei na iga ugeugeigeqnub. Une bei bei na iga niňaŋgwa laqnu. Iga are jaqatiŋgeqnu. <sup>5</sup> Jeu tamo naŋgi toqoŋ na iga lugonqnsib tonto talq di breigeqnub. Osib murqumy-oqnsib iga qa anjam uge uge mareleŋeqnub. Iga gaigai ŋes na ti jaqatiŋ na ti waukobaeqnum. Iga geregere ŋeiosaeqnum. Iga bati gaigai mam ti laqnum. <sup>6</sup> Iga gulbe kalil di oqnsim kumbra bole jiga saiqoji dauryeqnum. Iga qalie bole ti unum. Iga urur minjinj oqosaieqnu. Iga na tamo ungasari naŋgi kumbra bole bole enjreqnum. Iga Qotei aqa Mondor Bole aqa siŋila oqnsim unum. Iga na tamo kalil naŋgi qalaqalainjreqnum. Iga laŋa medabu na naŋgi qalaqalainjrosaieqnun. <sup>7</sup> Iga Qotei aqa anjam bole gaigai mareqnum. Iga Qotei aqa singila oqnsim wuaeqlun. Iga gago baŋ wo na ti baŋ qonaŋ na ti qoto qa inŋi inŋi ojoqnsim dena kumbra bole tinqtiŋ dauryoqnsim waueqnum.

<sup>8</sup> Tamo qudei naŋgi gago ñam soqteqnub. Ariya tamo qudei naŋgi gago ñam olo ugeteqnub. Tamo qudei naŋgi iga yomuigeqnub. Ariya tamo qudei naŋgi olo gago kumbra bole babteqnub. Tamo qudei naŋgi are qaleqnub, iga gisanj tamo. Sai. Iga anjam bole segi mareqnum. <sup>9</sup> Tamo qudei naŋgi iga qa qaliesai. Ariya tamo gargekoba naŋgi iga qa bole qalieeqnub. Iga moiyo tamo bulonum. Ariya

iga olo ñambile unum. Qotei na iga tingitgwa maroqnsiq deqa iga gulbe egeqnu. Ariya gulbe dena iga moiytgosaeqnu. <sup>10</sup> Iga are gulbeigeqnu. Di uñgum. Iga gaigai areboleboleigeqnu. Iga ñoro saiqoji unum. Di uñgum. Iga na tamo uñgasari nañgi aqaryainjreqnam nañgi laj qure qaji ñoro koba eleñeqnub. Iga ingi ingi saiqoji unum. Di uñgum. Iga ingi bole bole kalil olo ejunum.

<sup>11</sup> O Korin tamo uñgasari, iga anjam kalil endi boleq atsim ningi merngonum. Iga gago are miligi waqtosim ningi engekritonum. <sup>12</sup> Iga gago are miligi getentosai. Iga ningi tulan qalaqalaingeqnum. Ariya ningi nunjo are miligi getentejunub. Ningi iga koba na are qujaitosaieqnub. <sup>13</sup> Ningi ijo añgro bul unub deqa e ningi endegsi merngwai. Iga gago are miligi waqtosim ningi qalaqalaingeqnum dego kere ningi kamba nunjo are miligi waqtosib iga qalaqalaigoqniy.

### *Iga Qotei aqa atra tal bul unum*

<sup>14</sup> Tamo uñgasari Kristus qa nañgo areqalo sinjalatosaeqnub qaji nango kumbra nunjo kumbra ti ombla kerekere sai. Deqa ningi nañgi ti beterosib koba na laqnaib. Ningi kumbra bole dauryo qaji tamo unub. Ariya nañgi Qotei aqa dal anjam gotranyo qaji tamo unub. Deqa ningi nañgi ti beterqa kere e? Sai. Ningi suwanqoq di unub. Ariya nañgi ambruq di laqnub. Deqa ningi nañgi ti beterqa kere e? Sai. <sup>15</sup> Kristus Satan wo nañgi aiyel are qujaitosib ombla sqa kere e? Keresai. Ningi Kristus qa nunjo areqalo sinjilateqnu. Tamo uñgasari qudei nañgi Kristus

qa naŋgo areqalo singilatosaeqnub. Deqa ningi naŋgi ti areqalo qujaitosib ombla sqa kere e? Di dego keresai. <sup>16</sup> Qotei aqa atra tal ti gisaŋ qotei naŋgo atra tal ti beterosib ombla sqa kere e? Di dego keresai. Qotei ɻambile gaigai unu qaji aqa atra tal agi iga segi. Deqa Qotei aqa anjam bei nami endegsib neŋgrenyeb unu, “E naŋgo ambleq di sosiy walweloqnqai. E naŋgo Qotei sqai. Naŋgi ijo segi tamo unŋasari sqab.” <sup>17</sup> Tamo Koba a nami degsi marsiqa olo anjam bei dego endegsi marej, “Ningi na tamo unŋasari e qa qaliesai qaji naŋgi uratnjsrib sasaloiy. Ningi naŋgo kumbra jigat bei ojaib. Ojgasai di e ningi eleŋosiy boletŋgawai. <sup>18</sup> Osiy e nuŋgo Abu soqnit ningi ijo segi aŋgro tı̄ntı̄n sqab.” Tamo Koba siŋila ti unu qaji a nami degsi marej.”

## 7

<sup>1</sup> O ijo was bole, inŋgi bole bole Qotei a nami iga egwa marej qaji di a na egwas. Deqa kumbra jigat kalil gago jejamu ti gago are miligi ti di unub qaji di iga torei uratekritqom. Osim dena iga Qotei aqa ɻamgalaq di une saiqoji sosim a qa ulaoqnqom. Ulaoqnsim gago jejamu ti gago are miligi ti torei Qotei yekritosim aqa segi kumbra boleq di sosim dauryoqnqom.

*Pol a Korin Kristen naŋgi qa tulan arebole-boleiyej*

<sup>2</sup> Deqa ningi nuŋgo are miligi waqtosib iga qalaqalaigoqniy. Iga nami tamo qudei kumbra uge bei enjrosaioqnem. Iga tamo qudei ugeugein-jrosaioqnem. Iga tamo qudei naŋgo ingi ingi gisaŋ na yainjrosaioqnem. <sup>3</sup> E nuŋgo jejamuq

di une qametŋwa osim anjam endi merŋgosai. Agi e maronum, iga niŋgi tulaŋ qalaqalaingeqnum. Deqa iga moiqom kiyo iga ŋambile sqom kiyo di uŋgum. Iga gago are miligi waqtosim niŋgi qalaqalaingoqnsim sqom. <sup>4</sup> E qalieonum, nuŋgo kumbra bolequja. Deqa e niŋgi qa tulaŋ areboleboleibeqnu. Ijo are miligi niŋgi qa tulaŋ laejunu. Iga gulbe koba eqnum di uŋgum. E niŋgi qa are qaloqnsim dena e tulaŋ areboleboleibeqnu.

<sup>5</sup> Ariya iga Masedonia sawaq di brantosim bati deqa iga aqaratqa keresai. Sawa dia iga gulbe gargekoba itoqnem. Tamo qudei nangi iga ti anjam na qotoqnem. Iga ulaoqnsim are ton̄ton̄goqnej. <sup>6</sup> Niŋgi qalie, tamo uŋgasari are gulbeinjreqnu qaji nangi Qotei na olo are latetnjreqnu. Deqa Qotei na Taitus qarinjyonaqa a gagoq bonaqa iga unsimqa gam dena gago are olo laej. <sup>7</sup> Od, gam dena Qotei na gago are latetgej. Gam dena segi sai. Taitus a nami nuŋgo ambleq di sonaqa niŋgi na aqa are lateteb a degsi mergonaq qunamqa gam dena dego Qotei na gago are latetgej. Taitus a niŋgi qa iga endegsi saigej. Niŋgi e olo nubqajqa are koba qaloqnsib nuŋgo une qa are ugeinjgeqnu. Osib niŋgi e ombla are qujaitosib sqajqa singilaeqnub. Taitus a niŋgi qa iga degsi saigej deqa e tulaŋ areboleboleibeqnu.

<sup>8</sup> E qalieonum, anjam e nami neŋgrenyem qaji di niŋgi sisiyosib are gulbeinjgej. Ariya e deqa are ugeibosai. Bole, nami e are ugeibej. Ariya bini sai. Anjam e neŋgrenyem qaji dena niŋgi are gulbeinjgej. Sokiňalayonaq nuŋgo are gulbe di olo koboej. <sup>9</sup> Deqa e bini areboleboleibeqnu. Niŋgi are gulbeinjgej e deqa areboleboleibosai. Niŋgi

are gulbeinjej ariya bunuqna niŋgi olo are bulyeb deqa e areboleboleibeqnu. Qotei a segi na are gulbe di niŋgi engej. Deqa gago anjam neŋgreŋyem qaji dena niŋgi yala ugeugeinjosai. <sup>10</sup> Are gulbe Qotei na tamo ungasari naŋgi enjreqnu qaji dena naŋgo are olo bulyetnireqnu. Deqa Qotei na naŋgi eleŋeqnu. Nuŋgo are gulbe di ingi uge sai. Di ingi bole. Iga deqa are ugeigwasai. Ariya mandam tamo naŋgi are gulbe eqnub di ingi uge. Dena naŋgi moiyo gam tureqnub. Di kiyaqa? Naŋgi are bulyosai deqa. <sup>11</sup> Niŋgi geregere are qaliy. Are gulbe Qotei na niŋgi engej qaji dena niŋgi olo siŋgilatŋej. Agi bini niŋgi kumbra bole bole yeqnub. Are gulbe dena Qotei na nunjo are tigel-tetŋgonaqa niŋgi tamo qujai nami une atej qaji di a ŋirinteb. Osib niŋgi Qotei ulaiyosib aqa sorgomq di geregere soqneb. Qotei na nunjo are tigel-tetŋej deqa niŋgi iga qa are koba qalsib tamo une atej qaji di aqa une gereiyetqa waukobaeb. Niŋgi kumbra kalil di yeb deqa iga qalieonum, niŋgi tamo bole une saiqozi unub.

<sup>12</sup> O ijo was, e nami anjam neŋgreŋyosim nuŋgoq qarinqyem. Niŋgi na tamo une atej qaji aqa une gereiyetqajqa e deqa osim anjam di neŋgreŋyosai. Tamo agi tamo dena une yej qaji a qa dego e are qalsim anjam di neŋgreŋyosai. Niŋgi na iga tulaŋ qalaqalaigeqnub nuŋgo kumbra di Qotei aqa ŋamgalaq di boleq dqajqa deqa e anjam di neŋgreŋyem. Yim niŋgi qalieqajqa, nuŋgo kumbra di bolequja. <sup>13</sup> Nuŋgo kumbra bole degsiunu deqa gago are tulaŋ laejunu.

Gago are laejunu deqa iga areboleboleigeqnu. Ariya iga olo tulaŋ areboleboleigeqnu. Di kiyaqa?

Ningi na Taitus aqa are gulbe kobotetosib are boleteteb deqa. <sup>14</sup> Anjam kalil e ningi qa Taitus saiym qaji di bole. Deqa e ijo anjam deqa jemaibosai. E nungo kumbra bole kalil qa Taitus saiym sim nungo ñam soqtem. Taitus a qalie, anjam iga ningi qa a saiym qaji di bole. <sup>15</sup> Bati Taitus a nunqoq bonaqa ningi a ulaiyosib a osib aqa anjam dauryoqneb. Nunqo kumbra bole di Taitus aqa areqaloq di unu deqa a na ningi tulan qalaqlaingeqnu. <sup>16</sup> E ningi qa are singilatosim qalieonum, ningi kumbra bole kalil yoqnsib sqab. Deqa e ningi qa tulan areboleboleibeqnu.

## 8

### *Kristen nañgi silali koroiyeb*

<sup>1</sup> O ijo was ningi quiy. Qotei a Kristen tamo ungasari Masedonia sawaq di unub qaji nañgi qa are boleiyej. Iga deqa nañgi saingonam quiy. <sup>2</sup> Masedonia Kristen nañgi ingi ingi tulan saiqoji sosib gulbe qoboiyeqnab bati deqa Qotei na nañgi singilatnirnaqa nañgi areboleboleinjrnaqa Judia Kristen nañgi aqaryainjrqa marsib silali koba koroiyeb. <sup>3</sup> E deqa nañgi mernjgwai. Masedonia Kristen nañgi nañgo segi areqalo na silali di koroiyeb. Nañgo silali kiñala soqnej di nañgi koroiyeb. Osib nañgi na nañgo kumbra di bunyosib olo silali tulan koba koroiyeb. <sup>4</sup> Nañgi na iga waingosib endegsib mergoqneb, “Ningi iga odgibqa iga ningi beternjosim Qotei aqa tamo ungasari nañgi silali qa aqaryainjrqom.” <sup>5</sup> O ijo was, iga nami are qalem, Masedonia Kristen nañgi silali koroiyqab. Ariya nañgi kumbra di olo bunyosib Qotei aqa areqalo

dauryosib naŋgo segi jejamu Tamo Koba Yesus yeb. Osib iga dego egeb.

**6** Qotei a nami niŋgi qa dego are boleiyej deqa Taitus a silali koroiyqajqa wau di nuŋgo ambleq di tigeltej. Deqa iga Taitus singila na minjem, “Ni olo Korin Kristen naŋgoq aisim wau di kobotime.” **7** O ijo was, bati gaigai niŋgi kumbra tulanq boledamu yeqnub. Agi niŋgi Qotei qa nuŋgo areqalo singilatoqnsib aqa anjam palontqajqa waukobaeqnub. Niŋgi Qotei qa bole qalieeqnub deqa niŋgi aqa wau ojqajqa tulanq singilaeqnub. Osib niŋgi na iga tulanq qalaqalaigeqnub. Ariya Qotei a niŋgi qa are boleiyej deqa niŋgi silali koroiyqajqa wau di dego yosib silali koba atib soq nem.

**8** E niŋgi wau di yqajqa wainjwasai. Kristen tamo uŋgasari qudei naŋgi wau di yqajqa tulanq singilaeqnub. Naŋgo kumbra deqa agi e na niŋgi saŋgonum. Deqa niŋgi dego qalaqalaiyo kumbra qa tulanq singilaosib silali koroiyqajqa wau di yi. Yibqa e unsiy marqai, “Bole, niŋgi qalaqalaiyo kumbra yeqnub.” **9** O ijo was niŋgi qalie, gago Tamo Koba Yesus Kristus a niŋgi qa are boleiyej. A nami laŋ qure qaji ñoro koba ti soqnej. Sosiqa a niŋgi qa osiqa ñoro di olo uratosiqa ingi tulanq saiqojo soqnej. Di kiyaqa? Niŋgi kamba laŋ qure qaji ñoro koba oqajqa deqa.

**10** Silali koroiyqajqa wau deqa e olo ijo areqalo bei ubtosiy merŋgwai. Wausau bei nami niŋgi namoqna silali koroiyqajqa wau di tigelteb bati deqa niŋgi wau di yqajqa tulanq arearetngej. **11** Deqa bini niŋgi wau di olo kobotqa singilaoiy.

Ningga degyqab di bolequja. Nami ningi wau di yqajqa are tulanj prugñgoqnej. Deqa bini ningi silali soqnim singilaosib wau di kobotiy. <sup>12</sup> Ningi silali koroyqa are soqnim ningi koroyiy. Yim Qotei a ningi qa tulanj areboleboleiyqas. Ningi silali saiamqa di unjum. Koroiyaib. Qotei a deqa njirinqasai. Ningi silali soqnim di koroyiy.

<sup>13</sup> Ningi gulbe koba qoboiyesoqnib tamo qudei naŋgi olo gulbe saiqoji sqab e deqa ningi merñgosai. Iga kalil kerekere unum. <sup>14</sup> Deqa bini ningi ingi koba ejunub qaji ningi na tamo qudei ingi qa truqueqnub qaji naŋgi aqaryainjroqniy. Bunuqna ningi ingi qa truquabqa naŋgi na kamba olo ningi aqaryainjgwab. Ningi kumbra degyqab di ningi kalil kere na sqab. <sup>15</sup> Agi Qotei aqa anjam bei nami endegsib neŋgreñyeb unu, “Tamo naŋgi ingi koba koroyeb qaji naŋgi ingi uynab menetnjrnaqa ingi oto bei uratosai. Tamo naŋgi ingi kiñala koroyeb qaji naŋgi dego ingi uynab menetnjrnaqa ingi bei qa truquosai.”

*Pol a tamo qudei naŋgi qariŋnjrnaqa Korin Kristen naŋgoq aiyeb*

<sup>16</sup> E Qotei tulanj biŋyeqnum. Di kiyaqa? A na Taitus are pruqtetonaqa a iga ti are qujaitosiqa ningi qa are koba soqnej. <sup>17</sup> Iga Taitus minjem, “Ni olo Korin Kristen naŋgoq aiyeb.” Onaqa Taitus a aqa segi areqalo na odosiq silali koroyqajqa wau deqa tulanj siŋgilaosiq nunjgoq aiyej. <sup>18</sup> Iga Kristen was bei osim Taitus ombla qariŋnjrnam nunjgoq aiyeb. Was bei di a ñam ti unu. A Yesus aqa anjam bole maro qaji tamo. Kristen tamo ungasari qure qure kalilq di unub qaji naŋgi a qa qalie bole. <sup>19</sup> Di

segi sai. Kristen naŋgi na a gilteb deqa a iga ti koba na walweloqnsimqä silali koroiyqajqa wau di taqateqnum. Wau di aqa utru agiende. Qotei a Kristen naŋgi sougetejunub qaji naŋgi qa are boleiyeqnu. Iga wau di taqateqnum deqa Tamo Koba aqa ñam tulaŋ goge oqeinqaqa tamo kalil naŋgi unoqnsib iga qa mareqnub, “Bole, naŋgi wau di yqajqa tulaŋ singilaeqnub.” <sup>20</sup> O ijo was kalil, silali koroiyqajqa wau di tamo qudei na yomuiyaib deqa iga was bei di osim koba na silali di taqateqnum. <sup>21</sup> Gago are endegsi unu. Iga kumbra bole segi gaigai yoqnqom. Tamo ungasari kalil Tamo Koba a ombla naŋgo ñamgalaq di iga kumbra di yoqnqom.

<sup>22</sup> Ariya iga gago Kristen was bei dego qarinjyonam a Taitus was de wo naŋgi aiyel daurnjrsiq koba na nunqoq aiyeb. Was bei di agi iga nami bati gargekoba aqa kumbra tenemtoqnam. A Qotei aqa wau ojqajqa singilaoqnej iga degsi unoqnam. Bini a silali koroiyqajqa wau di ojqajqa tulaŋ singilaeqnub. A qalie, niŋgi kumbra bole yo qaji tamo unub. A degsi qalieosiq deqa a silali koroiyqajqa wau di ojqajqa tulaŋ singilaeqnub.

<sup>23</sup> Niŋgi Taitus qalie. A e ombla niŋgi qa are qaloqnsim waukobaeqnum. Niŋgi gago Kristen was aiyel naŋgi di dego qalie. Naŋgi Qotei aqa tamu ungasari qure qure kalilq di unub qaji naŋgi qa wau bole yeqnub. Naŋgo wau dena naŋgi Kristus aqa ñam tulaŋ soqteqnub. <sup>24</sup> Deqa niŋgi na was aiyel naŋgi di kumbra bole enjroqniy. Yim Kristen kalil naŋgi nunqo kumbra di unsib marqab, “Bole, naŋgi qalaqlaiyo kumbra dauryeqnub.” Osib

qalieqab, “Pol a Korin Kristen naŋgo kumbra bole qa iga saigeqnu di a gisanjosaieqnu. A anjam bole saigeqnu.”

## 9

### *Silali koroiyqajqa wau*

<sup>1</sup> Iga silali koroiyeqnum di Qotei aqa tamo ungasari naŋgi aqaryainjrqajqa deqa. Niŋgi wau di qalieonub deqa e olo anjam olekoba tortoryosiy neŋgreŋyqasai. <sup>2</sup> E qalieonum, niŋgi wau di yqajqa are tulan prugn̄eqnu. Deqa e gaigai Masedonia Kristen naŋgo ɻamgalaq di nuŋgo ŋam soqteqnum. Osim endegsi minjreqnum, “Wausau bei nami Akaia sawaq di Korin Kristen naŋgi silali koroiyqajqa wau di tigeltqa mareb.” Od, ningi wau di yqajqa tulan singilaeqnub. E na Masedonia Kristen naŋgi nunjo kumbra deqa sainjreqnam quoqnsib naŋgi gargekoba dego wau di yqajqa are prugnjreqnu. <sup>3</sup> E naŋgi endegsi minjrem, “Korin Kristen naŋgi silali koroiyqajqa tulan singilaeqnub.” Ariya e nunjo ŋam lanja soqto uge deqa ningi silali di koroiyyi. Utru deqa e was qalub naŋgi di qarinqn̄nam nunqoq aiyeb. <sup>4</sup> E qalieonum, niŋgi silali di koroiyosib atib sqas. Soqnim Masedonia Kristen qudei naŋgi e ombla na nunqoq bosim niŋgi nami silali di atebunu degsi unqom. Iga bosim degsi unqasai di iga niŋgi ti jemaigo uge. <sup>5</sup> E are qalem, e was qalub naŋgi di minjritqa naŋgi namoqna aisib nunjo silali niŋgi nami koroiyqa mareb qaji di niŋgi koba na gereiyqab. Gereiyibqa e bunuqna bosiy oqai. Yim tamo ungasari kalil naŋgi silali di unsib qalieqab,

bole, niŋgi nuŋgo segi areqalo na silali di ateb unu. E niŋgi silali di koroiyqajqa waingosaiqnem naŋgi degsib qaliegqab.

<sup>6</sup> Niŋgi geregere are qaliy. Tamo a ingi kiňala yagwas di a ingi kiňala olo oqas. Tamo a ingi koba yagwas di a ingi koba olo oqas. <sup>7</sup> Deqa niŋgi segi segi kalil silali atqajqa are soqnim silali atoqniy. Niŋgi are gulbe na silali ataib. Niŋgi tamo bei na waingim deqa silali ataib. Niŋgi nuŋgo segi areqalo dauryosib are bole na silali atoqniy. Yim Qotei na niŋgi tulaj qalaqalainjgoqnqas. <sup>8</sup> Qotei a niŋgi qa are boleiyosim ingi bole bole gaigai engoqnqa kere. Deqa niŋgi tulaj kere na sosibqa dena wau bole bole yoqniy. <sup>9</sup> Agi Qotei aqa anjam bei nami endegsib neŋgreŋyeb unu,

“Tamo qudei naŋgi saga yago breiyo bul naŋgo ingi ingi jeiyoqnsib tamo ingi saiqoji naŋgi enjreqnub.

Deqa naŋgo kumbra bole bati gaigai sqas.”

<sup>10</sup> O ijo was niŋgi qalie, Qotei a na qujai tamo naŋgi saga yago enjreqnaqa naŋgi breiyeqnub. Osiga tamo naŋgi bem enjreqnaqa naŋgi uyeqnub. Dego kere Qotei na ingi ingi engoqnimqa niŋgi tulaj kere na sqab. Deqa niŋgi Qotei aqa tamo ungasari naŋgi aqaryainjroqniy. Tamo naŋgi saga yago breiyeqnab ingi koba oqelenjeqnu dego kere nunjo silali koroiyqa wau di tulaj boleoqnqas. <sup>11</sup> Qotei na ingi ingi koba engoqnimqa niŋgi na kamba Kristen naŋgi silali qa aqaryainjrqajqa tulaj kere na sqab. Deqa niŋgi silali di koroiyosib gago banq di atib iga na osi aisim Kristen naŋgi enjrimqa naŋgi deqa Qotei biŋyioqnsib sqab. <sup>12</sup> Nuŋgo wau

dena Qotei aqa tamo uñgasari nañgi aqaryainjrimqa nañgi kere na sqab. Nañgi ingi bei qa truquqasai. Di segi sai. Nunjo wau deqa nañgi Qotei tulaj biñijoqnqab. <sup>13</sup> Ningi wau di yqab di Qotei aqa tamo uñgasari nañgi unsib qalieqab, bole, niñgi Kristus aqa anjam bole siñgila na ojoqnsib aqa medabu dauryeqnub. Od, niñgi na Kristen nañgi silali kobaquja na aqaryainjroqnqab di nañgi nunjo kumbra di unoqnsib Qotei aqa ñam soqtoqnqab. <sup>14</sup> Osib qalieqab, “Bole, Qotei a Korin Kristen nañgi qa are tulaj boleiyeqnu.” Nañgi degsib qalieosib niñgi tulaj qalaqalaingosib niñgi qa Qotei pailyoqnqab. <sup>15</sup> O ijo was niñgi quiy. Qotei a ingi tulaj kobaquja iga egej. Ingdi agi Kristus. Ingdi aqa utru iga geregere ubtosim marqa keresai. Qotei na ingi di iga egej deqa iga a tulaj biñijoqnqom.

## 10

### *Tamo qudei nañgi Pol qa yomuoqneb*

<sup>1</sup> Niñgi qudei e qa yomuoqnsib endegsib mareqnub, “Pol a nami iga koba na sosiqa aqa segi ñam aguq atoqnsiqa laesoqnej. Ariya a sawa isaq di sosiqa iga qa ñirinjoqnsiqa anjam singila na mergeqnu.” O ijo was niñgi mati Kristus aqa kumbra qa are qaliy. A aqa segi ñam aguq atoqnsiqa laesoqnej. <sup>2</sup> Deqa e nunjoq bosiy Kristus aqa kumbra di dauryosiy laesqai. E niñgi qa ñirinjpasai. Ariya tamo qudei nañgi are qaleqnub, iga mandam tamo nañgo kumbra dauryoqnsim laqnum. Tamo nañgi di e na ñirinjnjrsiy anjam siñgila na minjrqai. E laesqasai. <sup>3</sup> Bole, iga mandamq endi laqnum.

Ariya iga mandam tamo nañgo kumbra na qotosaieqnum. <sup>4</sup> Qotei na qoto qa ingi ingi iga egej. Ingi ingi di Qotei aqa singila ti unu. Di mandam qaji ingi ingi sai. Iga dena qotoqnsim gago jeu tamo nañgo singila gotranjeqnum. <sup>5</sup> Areqalo uge ti gisañ anjam ti di iga na gotranjeqnum. Kumbra uge kalil niñgi Qotei qaliejqajqa gam getentetnejeqnu qaji di dego iga na gotranjeqnum. Gago wau agiende. Iga na tamo uñgasari nañgo are tigelteqnjreqnam nañgi nañgo areqalo kalil Kristus yekriteqnub. <sup>6</sup> Deqa ijo was, iga niñgi qa tariñeqnum. Niñgi gago anjam kalil dauryekritibqa iga na tamo kalil Qotei aqa anjam gotranjeqnum qaji nañgi ñolawotnjqom.

<sup>7</sup> Niñgi laña babañ na tamo nañgo kumbra tenemtoqnaib. Niñgi geregere tenemtoqniy. Tamo bei a endegsi marqas, “E Kristus aqa tamo.” Ariya tamo di a olo endegsi poiyem, a Kristus aqa tamo qa marqo deqa iga dego Kristus aqa tamo unum. A degsi poiyem. <sup>8</sup> Tamo Koba a na iga singila egej deqa iga aqa wau ojeqnum. Iga niñgi singilatñgwajqa deqa wau ojosaieqnum. E gago wau deqa gago ñam kiñala soqtqai. E degyqai di e jemaibqasai. <sup>9</sup> Ariya niñgi endegsib are qalaib, “Pol a iga ula egwajqa deqa anjam singila na neñgreñyoqnsiq gagoq qarinjeqnu.” Niñgi degsib are qalaib. <sup>10</sup> Bole, tamo qudei nañgi e qa endegsib yomueqnub, “Pol a anjam singila na neñgreñyoqnsiq gagoq qarinjeqnu. Ariya a gago ambleq endi sosiq anjam mergoqnej di a singila saiqoji soqnej. Anjam palontqa wau dego a qaliesai bole sai.” <sup>11</sup> Tamo qudei nañgi e qa

degsib yomueqnub. Deqa tamo deqaji naŋgi endegsi poinjrem. Anjam iga sawa isaq endi sosim neŋgreŋyeqnum qaji di iga nuŋgo ambleq di sosim dauryeqnum.

<sup>12</sup> Tamo qudei naŋgi diqoqnsib naŋgo segi ñam soqteqnub. Iga naŋgi unub dego sai. Gago kumbra ti naŋgo kumbra ti ombla kerekere sai. Tamo naŋgi di mareqnub, “Gago kumbra bole. Tamo kalil naŋgo kumbra bolesai.” Naŋgi degsib mareqnub. Di kiyaqa? Naŋgi powo tulaŋ saiqoji unub deqa. <sup>13</sup> Iga naŋgi unub dego sai. Iga gago segi ñam soqtoqñqasai. Wau Qotei na egej qaji deqa segi gago ñam soqtoqñqom. Wau bei Qotei na egej qaji agiende. Iga na niŋgi Korin Kristen wauetŋgeqnum. <sup>14</sup> Iga Qotei aqa wau tamo kalil qa namoosim nuŋgoq di wau utru atsim Kristus aqa anjam bole niŋgi mernŋgoqnam. Iga tamo qudei naŋgo wau bajinosaoqnam. <sup>15</sup> Wau Qotei na egej qaji di segi iga ojqajqa singilaoqnsim gago ñam soqteqnum. Iga tamo qudei naŋgo wau Qotei na egosai qaji deqa gago ñam soqtosaieqnum. Gago are endegsiunu. Nuŋgo areqalo Yesus qa singilateb qaji di tulaŋ boleoqnimqa gago wau dego nuŋgoq di tulaŋ kobaoqñqas. <sup>16</sup> Kobaoqnimqa iga nuŋgo sawaq dena tigelosim sawa sawa isaq giloqnsim dia Yesus aqa anjam mare mare laqñqom. Tamo qudei naŋgi nami wauoqneb qaji sawa iga deq gilqasai. Iga naŋgo wau qa gago ñam soqtqasai.

<sup>17</sup> Agi Qotei aqa anjam bei nami endegsib neŋgreŋyebunu, “Tamo bei a ñam bei soqtqa marsimqa a Tamo Koba aqa ñam segi soqteme.” <sup>18</sup> Iga qalie, tamo bei a aqa segi ñam soqtqas di a Tamo

Koba aqa ñamgalaq di ñam saiqoji sqas. Ariya Tamo Koba a na tamo bei aqa ñam soqtetqas di a ñam bole oqas.

## 11

*Tamo qudei naŋgi gisanqoqnsib Qotei aqa wau tamo buleqnub*

<sup>1</sup> Niŋgi e odbibqa e olo nanari anjam kiňala mern̄gwai. Niŋgi e odbqa kereamqa e odbiy. <sup>2</sup> Aqo Qotei wo gago are koba endegsi unu. Niŋgi Kristus a segi qujai areiyosib aqa sorgomq di soqniy. Tamo bei na aqa dunje nami sambalaosai qaji di osim tamo qujai yim a na oqas dego kere e ningi Kristus aqa banq di atem. <sup>3</sup> E amal uge Satan qa are qalsim deqa e ningi qa ulaeqnum. A nami Iv gisanqyonaqa a une atej. Une dena nuŋgo areqalo ugetetŋimqa ningi Kristus a segi qalaqalaiyqa urataib deqa e ulaeqnum. <sup>4</sup> E qalieonum, tamo qudei naŋgi nuŋgoq boqnsib gisanqoqnsib Yesus bei qa anjam palontoqnsib mern̄geqnub. Yesus bei deqa iga nami anjam palontosaioqnem. Tamo naŋgi di mondor bei qa dego ningi mern̄geqnub. Di gisanq mondor. Mondor bei deqa iga nami ningi mern̄gosaiqnem. Yesus aqa anjam bole iga nami ningi mern̄goqnem qaji di dego tamo qudei naŋgi bubulyoqnsib olo anjam bei ningi mern̄geqnub. O ijo was ningi kiyaqa gisanq anjam di quoqnsib bole edegeqnub?

<sup>5</sup> Niŋgi qudei endegsib are qaleqnub, “Tamo naŋgi di Qotei na bole qarinŋjrnaq gagoq beb.” Di sai. Qotei na naŋgi qarinŋnjrosai. Niŋgi quiy. Tamo naŋgi di ñam ti unub ariya e dego ñam ti unum.

Deqa tamo naŋgi dena e buŋbosai. <sup>6</sup> Bole, e anjam marqajqa medabu gulbeibeqnu. Di uŋgum. E powo qa truquosaieqnum. Kumbra kalil e nuŋgo ambleq di yoqnem qaji dena e ijo powo babteqnam niŋgi unoqneb.

<sup>7</sup> Niŋgi qalie, e Qotei aqa anjam bole niŋgi merngoqnem bati deqa e nuŋgo silali ingi ingi yaingosaiqnem. Ijo kumbra dena e ijo segi ñam aguq atoqnem. Di kiyaqa? Nungo ñam olo goge oqwaŋqa deqa. E kumbra di yoqnem di e une atoqnem e? Sai. <sup>8</sup> E Kristen tamo uŋgasari qure qureq di unub qaji naŋgoq dena silali oqnsim olo nuŋgo ambleq di Qotei aqa wau laŋa ojoqnem. E nuŋgo silali yaingosaiqnem. Ijo kumbra dena e qure qureq di Kristen naŋgo silali bajinjobuloqnem. <sup>9</sup> Bati e nuŋgo ambleq di ingi ingi qa truquoqnsimqa e na tamo bei gulbe yosaioqnem. E niŋgi gulbe engwajqa tulan uratoqnem agi bini e degsi unum. Bati bei Kristen was qudei naŋgi Masedonia sawaq dena Korin qureq bosib ingi ingi qa e aqaryaiboqneb. Gam dena e niŋgi gulbe engwajqa uratoqnem. <sup>10</sup> Kristus aqa anjam bole ijoq di unu deqa e niŋgi endegsi merngwai. E nuŋgo silali yaingwa urateqnum. Ijo kumbra deqa e ijo segi ñam soqteqnum. E degoqnsiy sqai. Akaia sawaq di tamo qudei na e getentbqasai. <sup>11</sup> E niŋgi qalaqalaingosaiqnem deqa e kumbra di yeqnum kiyo? Sai bole sai. Qotei a qalie, e niŋgi tulan qalaqalaingeqnum.

<sup>12</sup> E nungo silali yaingwa urateqnum. E degoqnsiy sqai. Tamo qudei naŋgi nuŋgo ñamgalaq di iga bul sqa marsibqa naŋgo segi ñam soqteqnub. Deqa

e naŋgi gam getentetnjroqnqai. <sup>13</sup> Tamo naŋgi di Qotei na qariŋnjrosai. Naŋgi Yesus aqa wau tamo bolesai. Naŋgi gisaŋoqnsib naŋgo segi kumbra uge bulyoqnsib tamo bole buleqnub. Yeqnab tamo ungasari naŋgi na unjroqnsib mareqnub, “Naŋgi Kristus aqa wau tamo bole.” <sup>14</sup> O ijo was niŋgi naŋgo kumbra di unsib deqa tulan̄ prugaib. Iga qalie, Satan a dego gisaŋoqnsiqa aqa segi kumbra uge bulyoqnsiqa Qotei aqa laŋ angro bole suwaŋoq di unub qaji naŋgi buleqnu. <sup>15</sup> Satan a kumbra degyeqnu deqa aqa wau tamo naŋgi dego naŋgo kumbra uge bulyoqnsib Qotei aqa wau tamo bole buleqnub. Deqa iga naŋgo kumbra di unsim tulan̄ prugwasai. Mondon̄ Qotei na tamo naŋgi di naŋgo une deqa kambatnjsim awai ugedamu enjrqas.

*Pol a Qotei aqa wau ojoqnej deqa a gulbe  
gargekoba itoqnej*

<sup>16</sup> E olo mern̄gwai. Niŋgi e nanari tamo edegaib. Un̄gum, niŋgi e nanari tamo edegwab di kere. Deqa niŋgi e odbibqa e olo ijo ñam kiñala soqtqai. <sup>17</sup> E Tamo Koba aqa areqalo dauryosim anjam endi marosaieqnum. E nanari tamo bulosim deqa e anjam endi maroqnsim ijo segi ñam soqteqnum. <sup>18</sup> Tamo gargekoba naŋgi mandam tamo naŋgo kumbra dauryoqnsib naŋgo segi ñam soqteqnub. Deqa e dego kumbra di dauryosiy olo ijo ñam kiñala soqtqai.

<sup>19</sup> Niŋgi segi qa mareqnub, “Iga powo koba ti unum.” Ariya niŋgi kiyaqa olo nanari tamo naŋgi odnjreqnabqa naŋgi nanari anjam niŋgi mern̄geqnub? <sup>20</sup> Nuŋgo kumbra agiende. Tamo bei na niŋgi a laŋa kaŋgalyqajqa mern̄gimqa kiyo, nuŋgo

inggaingga saitimqa kiyo, nunjoinggaingga gisan na yaingimqa kiyo, aqasegiñam soqtimqa kiyo, nunjo ula poŋgimqa kiyo niŋgi a odyqab. <sup>21</sup> O ijo was, iga tamo naŋgi di bul sai. Iga singila saiqoji unum deqa iga na gulbe deqaji niŋgi enqwa keresai. E deqa jemaibqas e? Sai.

Tamo naŋgi di naŋgo segi ñam soqtqajqa ulao-saieqnub. Deqa e kamba dego ijo segi ñam soqtqai. O ijo was, e nanari tamo bulosiy deqa anjam endegsi mernjgwai. <sup>22</sup> Tamo naŋgi di mareqnub, “Iga Hibru tamo.” Ariya e dego Hibru tamo. Naŋgi mareqnub, “Iga Israel tamo.” E dego Israel tamo. Naŋgi mareqnub, “Iga Abraham aqa moma tiŋtiŋ.” E dego Abraham aqa moma tiŋtiŋ. <sup>23</sup> Naŋgi mareqnub, “Iga Kristus aqa wau tamo.” O ijo was, e nanari tamo bulosiy endegsi marqai, e dego Kristus aqa wau tamo. Agi e na tamo naŋgi di tulan buŋnjrsimqa ḥes na ti jaqatin na ti Kristus aqa wau ojeqnum. Bati gargekoba jeu tamo naŋgi na e tonto talq di waiboqneb. Osib e lubogargeko-batoqneb. Bati gargekoba e moiqa jojomoqnem. <sup>24</sup> Bati 5 Juda naŋgi na e kumbainbo gargekoba-toqneb. Sisiyeb 39. <sup>25</sup> Bati qalub naŋgi bu toqon na e luboqneb. Bati qujai naŋgi na e moiyoqbqa marsib meniŋ na luboqneb. Bati qalub e qobuŋ na gileqnam qobuŋ a padalej. Qobuŋ a padalonaq qolo ti qanam ti e yuwalq di otosi laqnem. <sup>26</sup> Bati gargekoba e sawa isaq singa na walweloqnem. Yeqnam ya koba doqnsiqa ya na e padalbqa jo-jomoqnej. E gamq di walweleqnamqa bajin tamo naŋgi gam getentoqnsibqa e lubqa laqneb. Juda naŋgi ti sawa bei bei qaji naŋgi ti dego e lubqa

laqneb. Qure qureq di, wadau sawaq di, yuwalq di dego e padalqa jojomoqnem. Gisan Kristen naŋgi na dego e ugeugeibqa laqneb. <sup>27</sup> E ɻes na ti jaqatin na ti waukobaoqnem. Qolo gargekoba e waukobaoqnsim ɻeiosaiqunem. E mam ti laqnem. E ya qarboqnej. Bati gargekoba e ingi saiqoji soqnem. Bati gargekoba e yorbeqnaqa e ijo jejamu kabutqajqa gara saiqoji soqnem. <sup>28</sup> Ariya bini gulbe qudei dego ijoq di branteqnub. Gulbe kobaquja bei agiende. E bati gaigai Kristen tamo ungasari qure qure kalilq di unub qaji naŋgi qa are koba qaleqnum. Naŋgi bole unub kiyo sai kiyo deqa e naŋgi qa tulaŋ are koba qaleqnum. <sup>29</sup> Deqa Kristen was bei aqa siŋgila saiamqa e was deqa are koba qalsiy e dego siŋgila saibqas. Ingi bei na Kristen was bei a uneq waiyimqa e was deqa are koba qalsiy are ugeibqas.

<sup>30</sup> O ijo was, gam bei saibqo deqa e ijo segi ñam soqtqai. Gulbe bei bei ijoq beqnu deqa ningi poŋgeqnu, e siŋgila saiqoji unum. E deqa qujai ijo ñam soqtqai. E ijo kumbra bei qa ijo ñam soqtqasai. <sup>31</sup> Tamo Koba Yesus aqa Abu Qotei a qalie, e anjam bole mareqnum. E gisanjosaeqnum. Deqa iga bati gaigai Qotei biŋyoqnqom. <sup>32</sup> Damaskus qureq di Mandor Aretas a na qure taqato qaji tamo minjnaqa a qoto tamo qudei naŋgi qariŋnjrnaqa naŋgi qure aqa siraŋme kalil taqatoqneb. Di kiyaqa? E ulaŋqa laqnitqqa naŋgi na e ojsib tonto talq di waibqajqa deqa. <sup>33</sup> Ariya Kristen was qudei naŋgi na e aqaryaibosib gumbaq di jigsib qure aqa jeŋ gogetosib sil na gumba tontosib jeŋ aqa siraŋme kiňalaq dena e uratbonab jeŋ oqeq

aiyem. Aisim qure taqato qaji tamo aqa banq dena ulanjem.

## 12

### *Qotei na ñeiobilqeい Pol osoryej*

<sup>1</sup> E gam bei saibqo deqa e olo ijo ñam soqtqai. Bole, e ijo ñam soqtqai kumbra dena e aqaryaibqa keresai. Di uñgum. Tamo Koba a na ñeiobilqeい bei e nami osorbej deqa ningi saiñgit quiy. <sup>2</sup> Neiobilqeい agiende. Wausau 14 koboej endi Qotei na Kristus aqa tamo bei osi oqsiqa torei lan qureq oqej. Lan qure di tulan goge koba. Tamo oqej qaji di e qalie. Tamo di agi e segi. A jejamu qorbi oqej kiyo aqa jejamu uratosiq oqej kiyo di e qaliesai. Qotei a segi qalie. <sup>3-4</sup> E qalieonum, Qotei na tamo di osi oqsiqa lan qureq oqej. A jejamu qorbi oqej kiyo aqa jejamu uratosiq oqej kiyo di e qaliesai. Qotei a segi qalie. A lan qureq oqsiq dia anjam bei quej. Anjam di aqa damu tamo bei na ubtosim marqa keresai. Anjam di marqajqa getento koba. <sup>5</sup> E tamo di aqa ñam soqtqai. E ijo segi ñam soqtqasai. E singila saiqoji unum deqa qujai e ijo ñam soqtqai. E ijo kumbra bei qa ijo ñam soqtqasai.

<sup>6</sup> E ijo segi ñam soqtqai di e nanari tamo sqasai. Di kiyaqa? E anjam bole marqai. E gisanqasai. Ariya e ijo segi ñam soqtqa uratonum. Tamo qudei nañgi ijo kumbra qa ti ijo anjam qa ti are qalsib ijo ñam soqtetbqab di kere. Nañgi ijo ñam lanja soqtetbaib.

### *Qotei a gulbe qarinjyonaq Pol aqa jejamuq aiyej*

<sup>7</sup> Qotei a ñeiobilqeい tulan boledamu e osorbonaq unem. Ariya e di unsiy olo diqaim deqa Qotei

na gulbe uge sil luwit bul qariñyonaq ijo jejamuq aiyej. Gulbe di Satan na ojsiqa dena e ugeugeibeqnu. <sup>8</sup> Deqa e singila na Qotei paileyoqalubtem, “O Abu, ni na gulbe di olo taqal atetbime.” <sup>9</sup> Onaqa Qotei a saidosiq endegsi merbej, “Ni singila saiqoji unum deqa e ni olo singilatmoqnqai. Osiy ni qa are boleiboqnqas. Dena ni keretmqas.” Qotei na e degsi merbej deqa e singila saiqoji unum di unjum. E olo areboleboleiboqnqas. Yim Kristus aqa singila ijoq di sqas. <sup>10</sup> E Kristus aqa ñam qa singila saiqoji sqai kiyo, tamo qudei na e misiliñboqnqab kiyo, e gulbe oqnqai kiyo, jeu tamo nañgi na e ugeugeiboqnqab kiyo, e waukobaoqnqai kiyo di unjum. E deqa areboleboleiboqnqas. Di kiyaqa? E singila saiqoji sqai batidi e Kristus aqa singila ti sqai.

*Korin Kristen nañgo areqalo Yesus qa singilateb qaji di  
Pol na olo singilatecnjrej*

<sup>11</sup> Anjam e mareqnum qaji endi nanari anjam. Niñgi segi na ijo are tigeltetbeqnub deqa e nanari anjam endi mareqnum. Niñgi ijo kumbra bole ubtosaieqnub deqa e segi kamba ijo kumbra bole ubteqnum. Bole, e ñam saiqoji. Ariya kiyaqa niñgi na olo tamo qudei nañgo ñam soqtoqnsib mareqnum, “Tamo nañgi di Qotei aqa anjam maro tamo bolequja”? O ijo was niñgi quiy. Tamo nañgi dena e bunbosai. <sup>12</sup> Agi e nuñgo ambleq di sosim mañwa gargekoba babtoqnem dena niñgi endegsib qalieeb, Qotei na e qariñbej. E singila na tigeloqnsim gulbe qoboiyoqnsim mañwa ti wau singila ti gargekoba nuñgo ambleq di babtoqnem.

Kumbra dena ningi osorŋgoqnej, e Qotei aqa wau tamo bole. <sup>13</sup> Kumbra kalil e qure qureq di Kristen naŋgo ambleq di yeqnum qaji di e nunŋo ambleq di dego yoqnem. Ariya kumbra qujai e nunŋo ambleq di yosai. E ningi gulbe enŋwa uratosim deqa e nunŋo silali inŋi inŋi yaŋgosaiqnej. Di e une yoqnem e? Sai. Ningi e une yoqnem edegosib ijo une di olo kobotetbiy.

<sup>14</sup> E nami nunŋoq boaiyeltem. Ariya bini e olo nunŋoq bqajqa are qaleqnum. E nunŋoq bqai di e ningi gulbe enŋwasai. E nunŋo silali inŋi inŋi yaŋwajqa are qalosaieqnum. E ningi segi eleŋqajqa are qaleqnum. Ningi qalie, aŋgro kiňlala naŋgi na naŋgo ai abu naŋgi silali qa aqaryainjrosaieqnub. Ai abu naŋgi na naŋgo aŋgro naŋgi silali qa aqaryainjreqnub. <sup>15</sup> E ningi tulanq qalaqalaingeqnum deqa e ijo inŋi inŋi ti ijo jejamu ti ningi torei enŋwajqa areboleboleibeqnu. Ariya kiyaqa ningi kamba olo e kiňala segi qalaqalaibeqnu?

<sup>16</sup> Ningi qudei e qa endegsib mareqnub, “Bole, Pol a gago silali inŋi inŋi boleq di yaigosaioqnej. Ariya a na iga walawalaigoqnsiq gago silali inŋi inŋi gisan na yaigoqnej.” <sup>17</sup> O ijo was, e nami Kristen was qudei naŋgi qarinŋjrnam nunŋoq aiyeb. Aisib ningi gisan geb e? Osib nunŋo silali inŋi inŋi laŋa yaŋgosib olo bosib e ebib e? Sai. <sup>18</sup> E na Taitus minjnam a nunŋoq aiyeb. E Kristen was bei dego qarinŋyonam a Taitus dauryosiq ombla na aiyeb. Aisib Taitus a ningi gisan geb nunŋo silali inŋi inŋi qudei bajnej e? Sai. Aqo Taitus wo areqalo qujai ti sosim gam qujai dauryosim kumbra bole segi yoqnem.

**19** Niñgi ijo anjam kalil endi sisiyosib endegsib are qalaib, “Pol a segi une saiqoji degsi iga mergwa osiqa anjam neñgreñyej.” Di sai. O ijo was bole, anjam kalil e neñgreñyonum qaji endi niñgi singilatñgwajqa deqa neñgreñyonum. E Kris-tus aqa tamo unum deqa e Qotei aqa ñamgalaq di anjam endi neñgreñyonum. **20** E niñgi qa ulae-qnum. E nuñgoq bosiy nuñgo kumbra unsiy e areboleboleibqas kiyo sai kiyo? Niñgi dego ijo kumbra unsib areboleboleinñgas kiyo sai kiyo? E deqa ulaeqnum. E nuñgoq bosiy nuñgo kum-bra endi unqai kiyo? Niñgi anjam na qoteqnub. Niñgi nuñgo Kristen was nañgi qa are ugeiñgeqnu. Niñgi minjin oqeqnu. Niñgi pupoelenjeqnu. Niñgi nuñgo Kristen was qudei nañgi misiliñnjreqnub. Niñgi yomueqnu. Niñgi diqeqnub. Niñgi Qotei aqa wau ugeugeiyeqnu. E nuñgoq bosiy nuñgo kumbra di unqai kiyo? **21** E bosiy nuñgo ambleq di tamo gargekoba nami une yoqneb qaji nañgi are bulyosai degsi unqai kiyo? Degsi unqai di ijo Qotei na nuñgo ñamgalaq di e olo jemai ebqas. Tamo nañgi di nami une endeqaji yoqneb. Nañgi kumbra uge jigat yoqneb. Nañgi sambala kumbra yoqneb. Nañgi kumbra uge yqajqa are prugnjro-qnej. E nuñgoq bosiy tamo nañgi di nañgo une qor-eiyosai degsi unqai di e nañgi qa are gulbeibqas. E deqa ulaeqnum.

## 13

*Pol a Korin Kristen nañgoq olo bqajqa are qale-qnu*

<sup>1</sup> E nami nuŋgoq boaiyeltem. Ariya bini e olo nuŋgoq bqajqa are qaleqnum. Agi Qotei aqa anjam bei nami endegsib neŋgrenyeb unu, “Tamo bei a une atimqa tamo aiyel kiyo tamo qalub kiyo naŋgi aqa une unsib babtibqa iga qusim marqom, ‘Bole, tamo di a une yqo.’” <sup>2</sup> E nami nuŋgoq bosim ningi uratŋgosim bati bei e olo nuŋgoq bosim ningi endegsi mernŋem, “E bunuqna nuŋgoq olo bosiy tamo une ateqnub qaji naŋgi ɻolawotnjqrai.” Ariya bini e sawa isaq endi sosim anjam di ningi ti tamo nami une atoqneb qaji naŋgi ti olo mernŋeqnum. <sup>3</sup> Ningi qalieqajqa, Kristus a ijo medabu na anjam mareqnu kiyo sai kiyo. E nuŋgoq bosiy tamo naŋgi une ateqnub qaji naŋgi di ɻolawotnqrit ningi unsib qalieqab, bole, Kristus a ijo medabu na anjam mareqnu. Ningi quiy. Kristus a singila saiqoji sosim ningi tingitŋwasai. A na aqa singila kobaquja ningi osorŋwas. <sup>4</sup> Bole, Kristus a ɻamburbasq di gainjeqnej bati deqa a singila saiqoji soqnej. Ariya a olo Qotei aqa singila osiq deqa bini a ɻamble unu. Iga Kristus beteryejunum deqa iga dego singila saiqoji unum. Ariya iga Qotei aqa singila osim Kristus ombla ɻamble sqom. Iga nuŋgoq bosim singila di ningi osorŋgwom.

<sup>5</sup> Ningi nuŋgo segi segi so tenemtoqniy. Ningi degyqab di ningi Kristus qa nuŋgo areqalo singilateqnub kiyo sai kiyo di qalieqab. Yesus Kristus a nuŋgo are miliq di unu di ningi poiŋgosai kiyo? A nuŋgo are miliq di sqasai di ningi endegsib qalieqab, ningi aqa tamo bolesai. <sup>6</sup> Ariya ningi iga qa endegsi poiŋgem, iga Kristus aqa wau tamo bole unum. <sup>7</sup> Iga

ningi qa endegsim pailyeqnum, “O Abu, ni na Korin Kristen naŋgi aqaryainjrimqa naŋgi kumbra uge kalil uratoqnsib kumbra bole bole yoqnqab.” O ijo was, iga wau bole yeqnum ningi di qaliejajqa deqa iga pailyosaieqnum. Ningi iga wau tamo bolesai edegwab di unŋum. <sup>8</sup> Ningi qaliej, iga Qotei aqa anjam ugetqa kerasai. Iga Qotei aqa anjam singilatqajqa waueqnum. <sup>9</sup> Deqa iga singila saiqoji soqniŋ ningi singila ti sqab di iga areboleboleigwas. Iga gaigai ningi qa endegsim pailyeqnum, “O Abu, ni na Korin Kristen naŋgi aqaryainjrimqa naŋgi torei kere na sqab.” <sup>10</sup> Tamo Koba a na e giltbej deqa e aqa wau taqateqnum. E nunŋoq bosiy ɿiriŋ anjam na nunŋo kumbra tingitetŋgwa uratonum. Deqa e isaq endi sosim anjam endi neŋgreŋyonum. E ningi singilatŋgwaqja deqa Tamo Koba a na e wau ebej. E ningi ugetŋgwaqja sai.

### *Pol a anjam getentosiq Kristen naŋgi kaiyeinjrej*

<sup>11</sup> Ariya ijo was, e ijo anjam getentqai. Ningi areboleboleingoqnam. Ningi kumbra bole kalil qa kere na sqajqa singilaoqniy. Ningi ijo anjam quoqnsib dauryoqniy. Ningi kalil areqalo qujaitosib soqniy. Yim Qotei a ningi ti sqas. Agi a na ningi tulan qalaqlaingeqnu. A are lawo qa utru.

<sup>12</sup> Ningi na nunŋo Kristen was kalil naŋgi segi segi kundoqnjriy. Kumbra di agi Qotei aqa segi tamo unŋasari kalil naŋgi yeqnum. Qotei aqa tamo unŋasari kalil qure endia unub qaji naŋgi na ningi kaiyeinjgonub.

**13** Tamo Koba Yesus Kristus a ningi qa are boleiyeme. Qotei na ningi qalaqalainjeme. Mondor Bole na ningi kalil aqaryaingimqa ningi a beteryosib koba na are qujaitosib soqniy. Bole.

**Yesus Aqa Anjam Bole 2014  
The New Testament in the Anjam language of Papua  
New Guinea, 2014 revision  
Nupela Testamen long tokples Anjam long Niugini,  
2014**

copyright © 2014 Wycliffe Bible Translators, Inc.

Language: Anjam

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-04-28

---

PDF generated using Haiola and XeLaTeX on 11 Nov 2022 from source files dated 9 Oct 2020

0eb339dc-c20a-5065-9483-338933d97585